

ხ ე ლ შ ე კ რ უ ლ ე ბ ა

სახელმწიფო შესყიდვის შესახებ N

(ხელშეკრულების პირობების საბოლოო ვარიანტი შეიძლება დაზუსტდეს და დაიხვეწოს ტენდერში გამარჯვებულ პრეტენდენტთან ხელშეკრულების გაფორმების პროცესში)

ქ. ბათუმი

----- 2018 წელი

ერთის მხრივ ა(ა)იპ - „აგროსერვის ცენტრი“ (შემდგომში „შემსყიდველი“), წარმოდგენილი მისი დირექტორის გოჩა ბერიძის სახით და მეორეს მხრივ „-----“ (შემდგომში „მიმწოდებელი“), წარმოდგენილი ----- სახით, „სახელმწიფო შესყიდვების შესახებ“ საქართველოს კანონის და პრეტენდენტის (დასახელება) სატენდერო წინადადების საფუძველზე, შემსყიდველის მიერ ჩატარებული ელექტრონული ტენდერის (სატენდერო განცხადება N) შედეგად დებენ წინამდებარე სახელმწიფო შესყიდვის შესახებ ხელშეკრულებას შემდეგზე:

1. გამოყენებული ტერმინების განმარტებები

ხელშეკრულებაში გამოყენებულ ტერმინებს აქვთ შემდეგი მნიშვნელობა:

- 1.1. „ხელშეკრულება სახელმწიფო შესყიდვების შესახებ“ (შემდგომში-„ხელშეკრულება“) შემსყიდველსა და მიმწოდებელს შორის დადებული ხელშეკრულება, რომელიც ხელმოწერილია მხარეთა მიერ, მასზე თანდართული ყველა დოკუმენტით და დამატებით, ასევე მთელი დოკუმენტაცია, რომელზეც ხელშეკრულებაში არის მინიშნებები;
- 1.2. „ხელშეკრულების ღირებულება“ ნიშნავს საერთო თანხას, რომელიც უნდა გადაიხადოს შემსყიდველმა მიმწოდებლის მიერ ხელშეკრულებით ნაკისრი ვალდებულების სრული და ზედმიწევნით შესრულებისათვის;
- 1.3. „შემსყიდველი“ – ორგანიზაცია, რომელიც ახორციელებს შესყიდვას;
- 1.4. „მიმწოდებელი“- პირი, რომელიც ახორციელებს სამუშაოს მოცემული ხელშეკრულების ფარგლებში;
- 1.5. „დღე“. „კვირა“, „თვე“ – კალენდარული დღე, კვირა, თვე;
- 1.6. „შესასრულებელი სამუშაოების ხარჯთაღრიცხვა“ – მიმწოდებლის მიერ ელექტრონული ტენდერის ფარგლებში წარმოდგენილი „შესასრულებელი სამუშაოების ხარჯთაღრიცხვა“ რომელიც თან ერთვის ხელშეკრულებას და წარმოადგენს მის განუყოფელ ნაწილს.
- 1.7. ინფორმაცია საგარანტიო ვადებისა და პირობების, სამუშაოთა წარმოების წესების, სამშენებლო და უსაფრთხოების ნორმების შესახებ – დანართი N1 –ის შესაბამისად, სატენდერო დოკუმენტაციაში მითითებული მინიმალური საგარანტიო ვადების შესაბამისად მიმწოდებლის მიერ შევსებული საგარანტიო ვადები და სამუშაოების წარმოების წესები, რომელიც წარმოადგენს ხელშეკრულების შემადგენელ ნაწილს.
- 1.8 ინფორმაცია სამშენებლო სამუშაოების შესრულების ვადებისა და პირობების შესახებ – დანართი N2–ის შესაბამისად, სატენდერო დოკუმენტაციაში მითითებული სამუშაოების შესრულების ვადებისა და პირობების შესაბამისად მიმწოდებლის მიერ შევსებული სამუშაოების შესრულების ვადები და პირობები, რომელიც წარმოადგენს ხელშეკრულების შემადგენელ ნაწილს.

2. ხელშეკრულების საგანი

2.1. ხელშეკრულების საგანს წარმოადგენს შუახევის მუნიციპალიტეტში, ვაზისა და ხეხილის სანერგე და საჩითილე მეურნეობების (საკ. კოდები: 24.02.34.017; 24.05.33.065; 24.07.36.411) სამშენებლო სამუშაოების შესყიდვა (კლასიფიკატორის კოდი CPV 45200000 - მთლიანი ან ნაწილობრივი სამშენებლო სამუშაოები და სამოქალაქო მშენებლობის სამუშაოები) წინამდებარე ხელშეკრულებით განსაზღვრული პირობებისა და წინამდებარე ხელშეკრულებაზე თანდართული შესასრულებელი სამუშაოების ხარჯთაღრიცხვის შესაბამისად.

3. ხელშეკრულების საერთო ღირებულება

3.1. ხელშეკრულების საერთო ღირებულება შეადგენს ----- (.....) ლარს, დღგ-ს ჩათვლით:

2018 წლის საბიუჯეტო სახსრებით: ----- ლარი.

2019 წლის წლის საბიუჯეტო სახსრებით: ----- ლარი.

3.2. ხელშეკრულების ღირებულება მოიცავს ხელშეკრულებით გათვალისწინებული სამუშაოების განხორციელებასთან დაკავშირებულ მიმწოდებლის ყველა ხარჯს და საქართველოს კანონმდებლობით გათვალისწინებულ გადასახადებსა და გადასახდელებს.

4. ანგარიშსწორების ფორმა და პირობები

4.1. მიმწოდებელთან ანგარიშსწორება განხორციელდება უნაღდო ანგარიშსწორების ფორმით, ეროვნულ ვალუტაში.

4.2. ხელშეკრულების ღირებულება მოიცავს ხელშეკრულებით გათვალისწინებული სამუშაოების განხორციელებასთან დაკავშირებულ მიმწოდებლის ყველა ხარჯს და საქართველოს კანონმდებლობით გათვალისწინებულ გადასახადებსა და გადასახდელებს, რომელთა გადახდაზეც პასუხისმგებელია მიმწოდებელი.

4.3. შესყიდვისას გამოყენებული იქნება წინასწარი გადახდის მექანიზმი, სადავანსო ანგარიშსწორება განხორციელდება აჭარის ავტონომიური რესპუბლიკის 2018 წლის ბიუჯეტის სახსრებით. ხელშეკრულების პირობებით გათვალისწინებული 2018 წლის ბიუჯეტით განსაზღვრული თანხის ფარგლებში სამუშაოების მიმდინარეობის პროცესში მიმწოდებელმა 2018 წლის 22 დეკემბრამდე უნდა წარმოადგინოს შეუსრულებელი სამუშაოების შესაბამისი ღირებულების (არაუმეტეს 580 000 ლარი) საბანკო გარანტია გაცემული საქართველოს ეროვნული ბანკის მიერ ლიცენზირებული საბანკო დაწესებულებიდან ან სსიპ „საქართველოს დაზღვევის სახელმწიფო ზედამხედველობის სამსახურის“ მიერ ლიცენზირებული სადაზღვევო კომპანიიდან, რომელიც სულ მცირე 30 (ოცდაათი) კალენდარული დღით უნდა აღმატებოდეს ხელშეკრულების მოქმედების ვადას, რის შესაბამისადაც მოხდება წინასწარი ანგარიშსწორება. საბანკო გარანტიის წარმოდგენის ვადის დარღვევის შემთხვევაში შემსყიდველი უფლებამოსილია ცალმხრივად შეწყვიტოს ხელშეკრულება.

4.4. მიმწოდებელი ვალდებულია წინასწარი ანგარიშსწორების შედეგად მიღებული თანხები გამოიყენოს მხოლოდ სახელმწიფო შესყიდვის შესახებ წინამდებარე ხელშეკრულებასთან დაკავშირებული ვალდებულებების შესასრულებლად.

4.5. შესრულებული ეტაპობრივი სამუშაოებიდან პირველი დაიფარება ავანსად მიღებული თანხები, ხოლო შემდეგ დანარჩენი შესრულებები.

4.6. სამუშაოთა მიღება და ანგარიშსწორება განხორციელდება ფაქტიურად შესრულებული სამუშაოების მიხედვით ექსპერტიზის დასკვნის წარმოდგენამდე, სატენდერო დოკუმენტაციითა და ხელშეკრულებით დადგენილი პირობების შესაბამისად.

4.7. ხელშეკრულების ღირებულების არანაკლებ 5%-ი ანაზღაურდება სამუშაოების დასრულებისა და საბოლოო მიღება-ჩაბარების აქტის გაფორმების შემდეგ. საბოლოო ანგარიშსწორების განხორციელებამდე მიმწოდებელი საკუთარი სახსრებით უზრუნველყოფს შესრულებული სამუშაოების ხარისხის, მოცულობის, რაოდენობის და ღირებულების დადასტურებას სსიპ „ლევან სამხარაულის სახელობის ექსპერტიზის ეროვნული ბიუროს“ საექსპერტო დასკვნით ან აკრედიტირებული ექსპერტის მიერ გაცემული საექსპერტო დასკვნით.

4.8. იმ შემთხვევაში, თუ სსიპ „ლევან სამხარაულის სახელობის ექსპერტიზის ეროვნული ბიუროს“ საექსპერტო დასკვნის ან აკრედიტირებული ექსპერტის მიერ გაცემული საექსპერტო დასკვნის მიხედვით გაირკვევა, რომ შესრულებული სამუშაოები არ შეესაბამება ხელშეკრულებითა და საპროექტო-სახარჯთაღრიცხვო დოკუმენტაციით დადგენილ მოთხოვნებს, აღნიშნულ შემთხვევაში მიმწოდებელი ვალდებულია 5 დღის ვადაში უკან დააბრუნოს (მითითებულ რეკვიზიტებზე)

შეუსრულებელი სამუშაოების ღირებულება (რომელიც არ იქნა ჩათვლილი საქსპერტო დასკვნით). მიმწოდებლის მხრიდან 5 დღის ვადაში თანხის დაუბრუნებლობის შემთხვევაში შემსყიდველი უფლებამოსილია მოითხოვოს ხელშეკრულების შესრულების უზრუნველყოფის საბანკო გარანტიის გამცემი დაწესებულებისაგან შეუსრულებელი სამუშაოების (რომელიც არ იქნა ჩათვლილი საქსპერტო დასკვნით) ღირებულების ანაზღაურება.

4.9. შესრულებული სამუშაოების ღირებულების ანაზღაურება (გარდა ავანსად გაცემული თანხებისა) მოხდება ფაქტიურად შესრულებული სამუშაოების მიხედვით, წინამდებარე ხელშეკრულების მე-5 მუხლით გათვალისწინებული წესით მიღება-ჩაბარების აქტის გაფორმებისა და შესაბამისი საგადასახადო დოკუმენტაციის შემსყიდველისათვის წარმოდგენიდან 10 (ათი) სამუშაო დღის ვადაში.

5. შესრულებულ სამუშაოთა მიღება-ჩაბარების წესი

5.1. მიმწოდებლის მიერ წარმოებული სამუშაოების ტექნიკურ ზედამხედველობას ახორციელებს შემსყიდველის უფლებამოსილი პირი - ტექნიკური ზედამხედველობის განმახორციელებელი პირი.

5.2. ხელშეკრულების საგნის მიღება ფორმდება (როგორც სრული, ასევე ნაწილობრივი ფორმით) შესაბამისი მიღება-ჩაბარების აქტის გაფორმებით. შესრულებული სამუშაოების (როგორც სრულად, ასევე ნაწილობრივ) მიღება-ჩაბარების აქტის შედგენამდე, მიმწოდებელმა უნდა უზრუნველყოს ტექნიკური ზედამხედველობის განმახორციელებელი პირის მიერ დამოწმებული შესრულებული სამუშაოების მოცულობების აქტის (ფორმა N2) წარმოდგენა, რომლითაც დასტურდება შესრულებული სამუშაოების ხარისხი, მოცულობა, ღირებულება და მათი შესაბამისობა საპროექტო-სახარჯთაღრიცხვო დოკუმენტაციასთან.

5.3. მიმწოდებელმა სამუშაოების დასრულებიდან 45 (ორმოცდახუთი) კალენდარული დღის ვადაში საკუთარი სახსრებით უნდა უზრუნველყოს შესრულებული სამუშაოების ხარისხის, მოცულობის, რაოდენობის და ღირებულების დადასტურება სსიპ „ლევან სამხარაულის სახელობის ექსპერტიზის ეროვნული ბიუროს“ საექსპერტო დასკვნით ან აკრედიტირებული ექსპერტის მიერ გაცემული საექსპერტო დასკვნით, რომლის საფუძველზეც მხარეებს შორის გაფორმდება საბოლოო მიღება-ჩაბარების აქტი.

5.4. თუ საექსპერტო დასკვნით დადგინდება, რომ შესრულებული სამუშაოები არ შეესაბამება მიმწოდებლის მიერ წარმოდგენილ დოკუმენტაციას, ხელშეკრულებით დადგენილ პირობებსა და საპროექტო-სახარჯთაღრიცხვო დოკუმენტაციას, მაშინ სამუშაოები არ ჩაითვლება დასრულებულად წუნდების აღმოფხვრამდე, შესაბამისად არ მოხდება საბოლოო მიღება-ჩაბარების აქტის შედგენა და მიმწოდებლის მიმართ გატარდება ხელშეკრულებითა და კანონმდებლობით გათვალისწინებული ღონისძიებები.

5.5. შემსყიდველის მხრიდან სამუშაოების მიღება-ჩაბარებაზე უფლებამოსილი წარმომადგენლებია ხელშეკრულების შესრულების კონტროლის განმახორციელებელი პირები.

6. სამუშაოების შესრულების ადგილი და ვადა

6.1. სამშენებლო სამუშაოების შესრულების ადგილი შუახევის მუნიციპალიტეტი (საკ. კოდები: 24.02.34.017; 24.05.33.065; 24.07.36.411).

6.2. სამშენებლო სამუშაოები მიმწოდებლის მიერ უნდა შესრულდეს ხელშეკრულების გაფორმებიდან ----- კალენდარული დღის ვადაში.

6.3. მიმწოდებელი ვალდებულია შემსყიდველს გადასცეს ნივთობრივად და უფლებრივად უნაკლო ხელშეკრულების საგანი.

7. მხარეთა უფლება-მოვალეობანი

7.1. შემსყიდველს უფლება აქვს შეამოწმოს სამუშაოების მიმდინარეობის შესაბამისობა წინამდებარე ხელშეკრულებით გათვალისწინებულ პირობებთან;

7.2. შემსყიდველი ვალდებულია:

7.2.1. მოახდინოს ანგარიშსწორება მიმწოდებელთან ხელშეკრულებით გათვალისწინებული ვადებისა და პირობების შესაბამისად;

7.2.2. უზრუნველყოს სამშენებლო სამუშაოების მიღება ამ ხელშეკრულებით დადგენილი პირობების გათვალისწინებით.

7.3. მიმწოდებელს უფლება აქვს მოსთხოვოს შემსყიდველს სამშენებლო სამუშაოების ღირებულების ანაზღაურება ხელშეკრულებით გათვალისწინებული ვადებისა და პირობების გათვალისწინებით.

7.4. მიმწოდებელი ვალდებულია:

7.4.1. დაიცვას ხელშეკრულებით გათვალისწინებული ყველა პირობა;

7.4.2. შეასრულოს ხელშეკრულების პირობები სათანადო ხარისხითა და სრული მოცულობით, იმ ვადაში, რომელიც მითითებულია ხელშეკრულებაში;

7.4.3. საკუთარი სახსრებით აღმოფხვრას აღმოჩენილი ხარვეზი.

8. ხელშეკრულებით ნაკისრი ვალდებულებების შესრულების კონტროლი

8.1. ხელშეკრულების შესრულების კონტროლს განახორციელებს შემსყიდველი ორგანიზაციის მიერ განსაზღვრული პირთა ჯგუფი.

8.2. კონტროლი გულისხმობს მიმწოდებლის მიერ ხელშეკრულების პირობების შესრულების მიმდინარეობის კონტროლს.

8.3. მიმწოდებელი ვალდებულია ხარჯთაღრიცხვაში გათვალისწინებული ხარისხის მასალები და საქონელი შეძენამდე შეათანხმოს შემსყიდველის უფლებამოსილ პირთან.

8.4. კონტროლის განმახორციელებელ პირთა ჯგუფის მიერ სამუშაოების შესრულების მიმდინარეობისას ხარვეზის ან ნაკლის აღმოჩენის შემთხვევაში, ასევე წინამდებარე ხელშეკრულებით გათვალისწინებული პირობების დარღვევის აღმოჩენის შემთხვევაში, კონტროლის ჯგუფი ადგენს შესაბამის წერილობით აქტს, რომლის საფუძველზეც, შემსყიდველის მიერ წერილობით ეცნობება მიმწოდებელს აქტში მითითებული დარღვევების აღმოფხვრისათვის, შესაბამისად შემსყიდველი უფლებამოსილია დააკისროს მე-9 მუხლით გათვალისწინებული პირგასამტეხლო და/ან შეწყვიტოს ხელშეკრულება.

8.5. გამოვლენილი ყველა ხარვეზის ან ნაკლის აღმოფხვრასთან დაკავშირებული ხარჯების ანაზღაურება ეკისრება მიმწოდებელს საქართველოს კანონმდებლობით დადგენილი წესით.

9. პირგასამტეხლო ხელშეკრულების პირობების შეუსრულებლობისათვის

9.1. ხელშეკრულებით ნაკისრი ვალდებულებების (მათ შორის საგარანტიო პერიოდში ნაკისრი ვალდებულების) შეუსრულებლობის ან/და დაგვიანებით შესრულების შემთხვევაში, მათ შორის გეგმა-გრაფიკით გათვალისწინებული თითოეული ვადის დარღვევისათვის, მიმწოდებელს დაეკისრება პირგასამტეხლო ყოველ ვადაგადაცილებულ დღეზე ხელშეკრულების მთლიანი ღირებულების 0,01%-ის ოდენობით;

9.2. თუ ხელშეკრულების შეუსრულებლობისათვის დაკისრებულმა პირგასამტეხლომ გადააჭარბა ხელშეკრულების ღირებულების 2%-ს, შემსყიდველს უფლება აქვს ცალმხრივად შეწყვიტოს ხელშეკრულება და მიმწოდებელს დააკისროს პირგასამტეხლო ხელშეკრულების საერთო ღირებულების 3%-ის ოდენობით;

9.3. სამუშაოთა წარმოების, საწარმოო უსაფრთხოების და შრომის დაცვის წესების დარღვევისათვის, მიმწოდებელს ყველა ჯერზე დაეკისრება პირგასამტეხლო 500 (ხუთასი) ლარის ოდენობით.

10. ხელშეკრულების შესრულების უზრუნველყოფის გარანტია

10.1. მიმწოდებელი ვალდებულია წარმოადგინოს (ხელშეკრულების ღირებულების 5%) ----- (-----) ლარის ოდენობის ხელშეკრულების შესრულების უზრუნველყოფის უპირობო და გამოუხმობი გარანტია.

10.2. ხელშეკრულების შესრულების უზრუნველყოფის უპირობო გარანტიის თანხა არ უნდა მცირდებოდეს მიმწოდებლის მიერ ხელშეკრულების ფარგლებში შესრულებული ვალდებულებების პროპორციულად და შემსყიდველ ორგანიზაციას უფლებას უნდა აძლევდეს, პირველი მოთხოვნისთანავე, გარანტიის გამცემი დაწესებულებისგან დაუყოვნებლივ, შემსყიდველის მოთხოვნის მიღებიდან არაუგვიანეს 5 სამუშაო დღისა, ყოველგვარი დასაბუთების გარეშე, მიიღოს გარანტიით გათვალისწინებული თანხა;

10.3. ხელშეკრულების შესრულების უზრუნველყოფის გარანტიის მოქმედების ვადა 30 (ოცდაათი) კალენდარული დღით უნდა აღემატებოდეს ხელშეკრულების მოქმედების ვადას.

10.4. მიმწოდებლის მიერ წარმოდგენილი ხელშეკრულების შესრულების უზრუნველყოფის გარანტია გამოიყენება მიმწოდებლის მიერ ხელშეკრულებით გათვალისწინებული ვალდებულებების დარღვევისა (მათ შორის ხელშეკრულებით გათვალისწინებული ვალდებულებების შესრულებაზე უარის თქმა, ვალდებულების არაჯეროვნად, არასრულად შესრულება და სხვა) და ხელშეკრულებით გათვალისწინებული პირგასამტეხლობის ასანაზღაურებლად, აგრეთვე ნებისმიერი ზიანის ანაზღაურების მიზნით, რომელიც მიაღდება შემსყიდველს მიმწოდებლის მიერ ხელშეკრულების პირობების შეუსრულებლობის ან არაჯეროვნად შესრულების გამო.

10.5. იმ შემთხვევაში თუ ხელშეკრულების 10.1. პუნქტით განსაზღვრული გარანტიით გათვალისწინებული თანხა არ აღმოჩნდება საკმარისი ხელშეკრულებით გათვალისწინებული პირგასამტეხლობის თუ ზიანის ასანაზღაურებლად, მიმწოდებელი ვალდებულია შესაბამისი შეტყობინების მიღებიდან 7 (შვიდი) კალენდარული დღის ვადაში უზრუნველყოს აღნიშნული (დარჩენილი) თანხის ჩარიცხვა შემსყიდველის მიერ მითითებულ ბიუჯეტის შესაბამის ანგარიშზე.

11. ხელშეკრულების მოქმედების ვადა, ხელშეკრულებაში ცვლილების შეტანა და ხელშეკრულების შეწყვეტა

11.1. ხელშეკრულება ძალაშია მხარეთა მიერ მისი ხელმოწერის დღიდან.

11.2. ხელშეკრულების მოქმედების ვადა 90 დღით აღემატება ხელშეკრულებით გათვალისწინებული სამუშაოების შესრულების ვადას, გარდა „ინფორმაცია საგარანტიო ვადებისა და პირობების, სამუშაოთა წარმოების წესების, სამშენებლო და უსაფრთხოების ნორმების შესახებ“ - დანართი N1-ით გათვალისწინებული საგარანტიო ვადებისა.

11.3. ხელშეკრულებით ნაკისრი ვალდებულებების შესრულების მოთხოვნის უფლება ძალაში რჩება ხელშეკრულების მოქმედების ვადის გასვლის შემდეგაც.

11.4. ხელშეკრულებაში ნებისმიერი ცვლილების, დამატების შეტანა შესაძლებელია მხოლოდ წერილობითი ფორმით, მხარეთა შეთანხმების საფუძველზე.

11.5. ხელშეკრულების პირობების, მათ შორის, ფასის შეცვლა დაუშვებელია, თუ ამ ცვლილებების შედეგად იზრდება ხელშეკრულების ჯამური ღირებულება ან უარესდება ხელშეკრულების პირობები შემსყიდველისთვის, გარდა საქართველოს სამოქალაქო კოდექსის 398-ე მუხლით გათვალისწინებული შემთხვევებისა. ხელშეკრულების პირობების გადასინჯვა ხდება კანონმდებლობით დადგენილი წესით.

11.6. ხელშეკრულების ერთ-ერთი მხარის მიერ ხელშეკრულების პირობების შეუსრულებლობის შემთხვევაში, მეორე მხარე უფლებამოსილია ცალმხრივად შეწყვეტოს ხელშეკრულება, მოქმედი კანონმდებლობით დადგენილი წესითა და პირობებით.

11.7. შემსყიდველს შეუძლია მიიღოს გადაწყვეტილება ხელშეკრულების ცალმხრივად შეწყვეტის შესახებ მიმწოდებლის მიერ ნაკისრი ვალდებულებების ან პირობების შეუსრულებლობის გამო.

11.8. ხელშეკრულება ასევე შეიძლება შეწყდეს მხარეთა ინიციატივით, ურთიერთშეთანხმების საფუძველზე.

12. ფორს-მაჟორი

12.1. მხარეები არ არიან პასუხისმგებელნი თავიანთი ვალდებულებების სრულ ან ნაწილობრივ შეუსრულებლობაზე, თუ ეს შეუსრულებლობა გამოწვეულია ისეთი გარემოებებით, როგორიცაა წყალდიდობა, ხანძარი, მიწისძვრა და სხვა სტიქიური მოვლენები, აგრეთვე საომარი მოქმედებები, თუ ისინი უშუალო ზემოქმედებას ახდენენ ხელშეკრულების შესრულებაზე. ხელშეკრულების შესრულების ვადა გადაიწევის შესაბამისი დროით, გარემოებათა დასრულების შემდეგ.

12.2. თუ სახელშეკრულებო ვალდებულებების მთლიანი ან ნაწილობრივი შეუსრულებლობის პირობები გაგრძელდა ერთ თვეზე მეტ ხანს, მხარეებს უფლება აქვთ შეწყვიტონ ხელშეკრულების მოქმედება, კომპენსაციის უფლების მოთხოვნის გარეშე.

12.3. მხარე, რომელსაც შეექმნა ფორს-მაჟორული გარემოება, დაუყოვნებლივ აცნობებს ამის შესახებ მეორე მხარეს.

13. დავები და მათი გადაწყვეტის წესი

13.1 მხარეთა შორის წამოჭრილი ყველა დავა გადაიჭრება ურთიერთშეთანხმების გზით. შეთანხმების მიუღწევლობის შემთხვევაში, დავის გადასაწყვეტად მხარეები უფლებამოსილნი არიან მიმართონ სასამართლოს საქართველოს მოქმედი კანონმდებლობის შესაბამისად.

14. სხვა პირობები

14.1. ხელშეკრულების განუყოფელ ნაწილს წარმოადგენს საჩითილე მეურნეობის მშენებლობის საპროექტო-სახარჯთაღრიცხვო დოკუმენტაცია.

14.2. მიმწოდებელი ვალდებულია ხელშეკრულებით გათვალისწინებული სამუშაოები განახორციელოს ხელშეკრულების პირობათა შესაბამისად, აგრეთვე მოქმედი კანონმდებლობით ასეთი სამუშაოებისათვის დადგენილი ნორმებისა და სტანდარტების სრული დაცვით.

14.3. მიმწოდებელი ვალდებულია გადაიხადოს სამუშაოების მიმდინარეობის პროცესში შემსყიდველის სარგებლობაში არსებული დენის წყაროდან მის მიერ მოხმარებული (ასეთის არსებობის შემთხვევაში) ელექტრო-ენერგიის ღირებულება.

14.4. საგარანტიო ვადის განმავლობაში მიღებული შეტყობინების მიღებიდან შეტყობინებაში მითითებულ ვადაში მიმწოდებელი ვალდებულია საკუთარი ხარჯით გამოასწოროს ან სრული მოცულობით აანაზღაუროს როგორც შესაბამისი ხარჯები, ასევე ხარვეზის შედეგად შემსყიდველისათვის მიყენებული ზიანი.

14.5. მხარეები აუნაზღაურებენ ერთმანეთს მიყენებულ ზარალს საქართველოს კანონმდებლობის შესაბამისად.

14.6. არც ერთ მხარეს არა აქვს უფლება გადასცეს მესამე პირს თავისი უფლებები და მოვალეობები, მეორე მხარის წერილობითი თანხმობის გარეშე.

14.7. მესამე პირთან ურთიერთობაში მხარეები მოქმედებენ თავიანთი სახელით, ხარჯებითა და რისკით.

14.8. ხელშეკრულება შედგენილია ქართულ ენაზე, ორ ეგზემპლარად, რომელთაც აქვთ თანაბარი იურიდიული ძალა და ინახება მხარეებთან. ხელშეკრულებასთან დაკავშირებული ნებისმიერი მიმოწერა შესრულებული უნდა იყოს ქართულ ენაზე.

15. მხარეთა რეკვიზიტები

შემსყიდველი:

მიმწოდებელი:
